


Sehalalelo sa Selekane se Secha



SABATHA MANTSIBOEA

Bakeng sa Boithuto ba Beke Ena Bala:

Exod. 25:8; Esa. 53:4–12; Baheb. 10:4; Baheb. 9:14; Baheb. 8:1–6; 1 Tim. 2:5, 6.

Teman'a Khopolo:

“Ke ka baka leo Kreste e leng ‘muelli oa selekane se secha, hore. . . . ba bitsisoeng ba fuoe lefa le sa feleng leo ba le baletsoeng” (*Baheberu 9:15*).

Phirimaneng eo ho neng ho se na ngoeli, leholimo le le letšo ba bo nka Ntjana, Frank o n’ a aparetsoe ke lefifi ha a tsamaea literateng tsa toropo tse khutsitseng. Kamor’a nako a utloa mehato kamor’a hae; motho e mong ea mo setseng morao lefifing leo. Motho eo oa mo fumana eaba o re, “Ke Frank oa mohatisi?” “E, ke ‘na. Empa u ntsebile joang?” “Hantle,” ha arabela motho eo, “Ha ke u tsebe. Empa ke tseba moholoan’ao haholo, le lefifing boitšoaro ba hau, tsela ea hau eo u tsamaeang ka eona, le sebopelo sa hau kaofela li nkhopolitse eena haholo eaba ke etsa khakanyo ea hore o ngoan’abo, hobane o kil’a mpoella ka oena.” Pale ena e senola ‘nete e matla mabapi le tšebeletso ea sehalalelo ea Iseraele. Bible e re, e ne e le liriti le litšoantšo tseo ka ho hlaka li tšoantšang le ho senola linnete tseo li neng li li emetse: lefu, le bosebeletsi ba moprista ea phahameng tsa Kreste sehalalelong sa leholimo.

Beke ka Bokhutšoanyane: Hobaneng ha Molimo o ne o batla ba-Iseraele ba mo ahele sehalalelo? Sehalalelo se re ruta eng ka Kreste e le ea re nkelang sebaka? Jesu o etsa eng leholimong e le Moemeli oa rona?

**Ihute thuto ea beke ena ho lokisetsa Sabatha sa la 12 Phuptjane.*

Likamano

“Ke tla ‘ne ke ahe har’a lona, ‘me moea oa ka u ke ke oa tenoa ke lona, ke tla itsamaela har’a lona, ke be Molimo oa lona, lona le be sechaba sa ka” (Lev. 26:11, 12).

Ntlha e le ‘ngoe e lokela hore e be e hlakile joale: e ka ba ke selekane sa khale kapa selekane se secha, Jehova o batla kamano e atamelaneng, ea lerato le sechaba sa Hae. Hantle-ntle, lilekane li thusa ho etsa (ka ho haelloa ke mantsoe) “melaoana” ea kamano.

Kamano e bohlokoa seleaneng, nakong e fe kapa e fe kapa leha e le boemong bo fe kapa bo fe. Feela, hore kamano e be teng, ho lokela ho be le liketso tse amahanyang, puisano, le kopano, haholo-holo bakeng sa batho ba baetsalibe, ba liphoso, ba lipelaelo. Jehova, e fela, ka ho tseba taba ena, a nka khato ho etsa bonnete ba hore o iponahatsa ho rona ka litsela tseo—ka hare ho meeli ea botho bo oeleng—re ka amanang le Eena ka tsela e utloahalang.

Bala Exoda 25:8, taelo ea Jehova ea khaho ea sehalalelo. Jehova o fana ka mabaka a fe a ho batla hore ba etse see?

Karabo ea potso ena, ehlile, e tlisa potso e ‘ngoe, ‘me eona ke hobaneng? Hobaneng ha Jehova a batla ho phela har’a sechaba sa Hae? ‘Nete, mohlomong, e ka fumanoa litemaneng tse peli tsa kajeno, tse ngotsoeng kaholimo. Hlokomela, Jehova o tla ‘ne a “ahe” (kapa a “lule”) har’a bona; o re a ke ke a “tenoa” ke bona. O re o tla “itsamaela” har’a bona ‘me e tla ba Molimo oa bona, bona e be sechaba sa Hae (Lev. 26:11, 12). Sheba lintlha tse fumanehang litemaneng tsena. Lehlakore la kamano le hlahella ka makhetha a maholo, hape.

Nka metsotso e se mekae: qhaqholla Levitike 26:11, 12 le Exoda 25:8. Ngola kamoo lintlha kaofela li kopanang hantle le taba ea hore Jehova o batla kamano le sechaba sa Hae?

Tsitsa haholo ka ho khetholloha moo Jehova a reng “moea oa ka o keke oa tenoa ke lona.” Ke eng ka sehalalelo ka bosona e fanang ka tsea eo botho bo oeleng, ba boetsalibe bo ka amohelang Jehova, ‘me hobaneng ha ho le bohlokoa ha kaalo bakeng sa ho thea selekane?

Sebe, Sehlabelo, le Kamohelo (Baheb. 9:22)

Tsela e neng e hlomamisitsoe ke leholimo bakeng sa moetsalibe oa Testamenteng ea Khale hore a tlose ho eena sebe le molato e ne e le ka mahlabelo a liphoofole. Linyehelo tsa mahlabelo a ba-Iseraele li ngotsoe ka botlalo ho Levitike khaolo ea 1 ho isa ho 7. Ho ne ho sebelisoa le ho qhaloa mali ka hloko e kholo mefuteng e fapaneng ea mahlabelo. Kannte, mali litšebelatsong tsa mahlabelo a karolo ea oona ke e 'ngoe ea tse tlisang bonngoe mahlabelong a ba-Iseraele.

Motho ea neng a entse sebe — ‘me kahoo a robile kamano ea selekane le molao o neng o se tsamaisa—o ne a ka buseletsoa setsoalleng se felletseng le Molimo le batho ka ho tlisa sehlabelo sa phoofole ho mo nkela sebaka. Mahlabelo, ka meetlo ea oona, e ne e le mokhoa oo Molimo a o thehileng oa ho tlisa tlhoeko sebeng le bokhopong. Li ne li thehetsoe ho hloekisa moetsalibe, ka ho fetisetsoa sebe ka seng le bokhopo sehalelalong ka ho fapatsa mali le ho bopa bocha kopano le setsoalle sa selekane se felletseng sa ea bakileng le Molimo oa hae eo e leng Jehova ea pholosang.

Litaba tsee, tse boletsoeng kaholimo, li re thusa joang ho utloisisa lipotso tse qetellong ea thuto ea maobane?

Hone hona le boleng ba boporofeta bo fe mahlabelong a liphoofole? (Esa. 53:4–12, Baheb. 10:4).

Mahlabelo a Testamente ea Khale e ne e le mokhoa o khethuoeng ke leholimo oa ho tlosa sebe le tlole ho moetsalibe. A ne a fetola boemo ba moetsalibe ho tloha ho ho ba molato le ho lokeloa ke lefu ho ea ho ba tšoarelo le ho buseletsoa kamanong ea selekane ea Molimo le motho. Empa ho ne ho na le moelelo oo mahlabelo a liphoofole a neng a na le sebopelo sa boporofeta. Ho ne ho se phoofole, e lekaneng ho nka sebaka sa tefelo ea sebe le molato oa motho. Sengoli sa Baheberu o ngotse ka puo ea hae: “Hobane mali a lipoho le liphooko a sitoa ruri ho tlosa libe” (Baheb. 10:4). Ka mokhoa o joalo, sehlabelo sa phoofole se ne se reretsoe ho ba mokhoa oa ho shebela pele ho Mohlanka oa Molimo ea halalelang, ea neng a tla shoela libe tsa lefatše. Ke ka mokhoa oona ona oo moetsalibe a tšoareloang ‘me a amoheloang ke Jehova, le ho thehoa ha motheo oa kamano ea selekane.

A k’u ikenye lieteng tsa motho ea phetseng nakong ea Testamente ea Khale, moo ba neng ba etsa mahlabelo a liphoofole sehalelalong. U ntse u hopola hape kamoo leruo la liphoofole le neng le le bohlokoa kateng moruong oa bona, setsong, le tseleng ea bona ea bophelo ka botlalo, mahlabelo aa a ne a lokela ho ba fa thuto e fe ka theko ea sebe?

Ho Nkela Sebaka

“Ea iteletseng libe tsa rona, a tle a re namolele lefatšeng la joale le lebe, ka ho rata ha Molimo, Ntat’a rona” (Bagal. 1:4).

Ha ho potang: e ‘ngoe ea taba tsa mantla (haeba ha se eona taba-kholo) ea Testamente e Ncha ke hore Jesu Kreste o shoele e le Sehlabelo sa libetsa lefatše. ‘Nete ena ke eona motheo oa leano la pholoho ka botlalo. Thuto e fe kapa e fe ka Molimo e hang mali a Kreste a tefelo e hana pelo le moea oa Bokreste. Sefapano se se nang mali ha se ka ke sa pholoso motho.

Nahana ka temana ea kajeno e be u araba lipotso tse: Na Jesu o ile a ithaopa ho shoa? O shoetse mang? Lefu la hae le ne le tla fihlela eng?

Ho nkela sebaka ke sona senotlolo sa leano lohle la pholoho. Ka lebaka la libe tsa rona, re tšoanetsoe ke lefu. Kreste ka lebaka la lerato la Hae ho rona, “a itella libe tsa rona” (Bagal. 1:4). O ile a shoa lefu le neng le re lokela. Lefu la Kreste e le Eena ea nkelang baetsalibe sebaka ke ‘nete e kholo eo ho tsoa ho eona ho kollang linnete tse ling tsohle. Tšepo ea rona, ea pusetso, ea tokoloho, ea bophelo bo sa feleng paradeising, e lutse holim’a mosebetsi oo Jesu a o entseng, oa ho itella libe tsa rona. Kantle ho oona, tumelo ea rona e ne e tlo hloka moelelo. Re ka ‘na ra beha tšepo ea rona sefikeng sa hlapi. Pholoho e tla feela ka mali, mali a Kreste.

Sheba litemana tse latelang: Matt. 26:28, Baef. 2:13, Baheb. 9:14, 1 Pet. 1:19. Li re bolella eng ka mali? Ha ho le joalo, mali a bapala karolo e fe leanong la pholoho?

“Ha se thato ea Molimo hore e be ha u tšepe, e be u sotla moea oa hau ka tšabo ea hore Molimo ha o na ho u amohela hobane o mosetsalibe sa se nang tokelo. . . . U ka re: ‘Kea tseba hoba ke moetsalibe, ‘me ke lona lebaka leo ke hloakang Mopholosi. . . . Ha ke na makhabane leha e le molemo oo ka oona nka kopang pholoho, empa ke hlhisa kapele ho Molimo mali a lefellang tsohle a Konyana ea Molmo e se nang sekoli, e tlosang libe tsa lefatše. Ena ke eona feela kopo ea ka.’”—Ellen G. White, *The Faith I Live By*, leq. 100.

Tsepama qotsulong ea Ellen White e kaholimo. E ngole hape ka mantsoe a hau. E etse ea hau. Beha matsoalo a hau le bohloko ho eona e be u ngola fatše seo lipallo tse ngotsong moo li u neang sona. U na le tšepo e fe ka lebaka la mali a selekane se secha?

Moprista ea Phahameng oa Selekane se Secha

Sehalalelo sa lefatšeng moo Molimo o ileng oa khetha ho lula le sechaba sa Hae teng, khubu ea sona e ne e le mahlabelo a liphoofole. Feela, tšebeletso e ne e sa felle ka ho shoa ha liphoofole tsena. Moprista o ne a sebeletsa ka mali ka sehalalalong sebakeng sa moetsalibe kamor'a hore phoofole ea sehlabelo e bolaoe. Tšebeletso ena eohle, leha ho le joalo, e ne e le seriti feela, letšoa la seo Kreste a ne a tla se etsetsa lefatše. Ka mokhoa o joalo, joalo ka ha matšoa (tšebeletso ea sehalalelo) a n' a sa felle ka ho shoa ha phoofole, mosebetsi oa Kreste bakeng sa rona le oona ha oa fella ka lefu la Hae sefapanong.

Bakeng sa kajeno ithute Baheberu 8:1–6. Rapela ka litemana tsena. Kopa Morena hore a u thuse u utloisise se boleloang mona le hore ke hobaneng ha se le bohlokoa ho rona hore re se tsebe. Ha u qetile, ngola ka mantsoe a hau seo u nahanang hore ke molaetsa oa Morena ho rona litemaneng tsena. Ipotse, hape, litemana tsee li re thusa joang ho utloisisa selekane se secha?

Joalo kaha hone ho e-na le sehalalelo se lefatšeng, boprista, le bosebeletsi tlas'a selekane sa khael, ho boetse ho na le sehalalelo se leholimong, boprista ba leholimo, le bosebeletsi ba leholimo tlas'a selekane se secha. Leha ho le joalo, tseo e neng e le feela matšoa, litšoaantšo, le (Baheb. 8:5) seleaneng sa khale li fetohile 'nete ho se secha. Hape, ho e-na le phoofole e se nang maitšoa e le eona e nkang sebaka sa rona, re na le Jesu ea se nang sebe; ho e-na le mali a phoofole, re na le mali a Kreste; ho e-na le sehalalelo se entsoeng ka matsoho a motho, re na le "tabernakele ea sebele e hlomiloeng ke Morena, e seng ke motho" (Baheb. 8:2); and rather than a sinful, erring human priest, we have Jesus as our High Priest ministering in our behalf. With all this in mind, think about Paul's words: "How shall we escape, if we neglect so great salvation. . . ?" (Heb. 2:3).

Nahana ka eona: Jesu o phetse bophelo bo se nang sebe sebakeng sa hau, a shoa sebakeng sa hau, 'me joale o leholimong, o ntse a sebeletsa ka sehalalalong sebakeng sa hau. Tsena tsohle li entsoe hore u tle o bolokehe khahlanong le litholoana tsa ho qetela tse tšabehang tsa sebe. Etsa morero oa hore letsatsi le hlahlamang o ee ho bolella motho e mong litaba tsena tse molemo, motho e mong eo u nahanang o batla ho li utloa. Hlopha esale pele, u ipapisitse le thuto ea kajeno, seo u tla se bua.

Bosebeletsi ba Leholimo (Baheb. 9:24)

Ithute Baheberu 9:24, moeelong oo e fanoeng ka oona ka kotloloho, oa ho hlalosa bosebeletsi ba Kreste leholimong kamorao ho lefu la Hae la sehlabelo bakeng sa rona. Leha ho ka buuo tse ngata, re batla ho tsepama ntlheng e le 'ngoe, poleloana e qetellong, e reng Kreste hona joale o hlaha kapele ho boteng ba Molimo bakeng sa rona. Nahana ka se boleloang ke taba eo. Rona, batho ba baetsalibe ba oeleng; ba neng ba ka timetsoang ke khanya ea Molimo haeba re ne re ka tobana le eona hona joale; rona, ho sa natse na re bile babe ha kae kapa na re robile molao o halalelang oa Molimo hampe ha kae, re na le ea hlahang kapele ho sefahleho sa Molimo bakeng sa rona. Re na le moemeli ea emeng kapele ho Ntate bakeng sa rona. Nahana kamoo Kreste ha a sa le lefatšeng a n' a le lerato, a tšoarela, le ho amohela kateng. Eena Motho eo ke eena 'Muelli oa rona leholimong?

Ena ke karolo e 'ngoe ea litaba tse molemo. Jesu ha a re lefela kotlo ea libe tsa rona feela, ka ho ipesesa tsona Sefapanong (1 Pet. 2:24), empa joale o eme kapele ho sefahleho sa Molimo, e le 'Muelli mahareng a leholimo le lefatše, mahareng a botho le Bomolimo. Taba ena e utloahala ka ho phetheha. Jesu, e le Molimo le Motho ka bobeli (Motho ea phethehileng ea se nang sebe) ke Eena feela ea ka koalang lekhalo le bakiloeng ke sebe mahareng a motho le Molimo. Ntlha ea bohlokoa e lokelang ho hopoloa ho tsena tsohle (leha li le ngata) ke hore Monna o teng hona joale, Motho, ea tsebang mathata, mahloko, le liteko tsa rona (Baheb. 4:14, 15), a emeng bakeng sa rona kapele ho Ntate.

“Hobane Molimo o mong feela, le 'Muelli mahareng a Molimo le batho o mong, e leng Jesu Kreste motho, ea inetseng ho ba topollo ea bohle. Ke boo bopaki bo beiloeng mehlang ea teng” (1 Tim. 2:5, 6). Temana tsee li beha Jesu mesebetsing e fe e 'meli, 'me mesebetsi ee e ne e tšoañtšoe joang litšebelsoang tsa sehalalelo se lefatšeng?

Litaba tse monate tsa selekane se secha ke hore hona joale, ka lebaka la Jesu, baetsalibe ba bakileng ba na le e mong ea ba emetseng leholimong kapele ho Ntate, e mong ea ma fumanetseng seo ka bobona ba neng ba sitoa ho ka iphumanela, e leng ho loka ho phethehileng, ho loka hoo e leng hona feela ho ka emang kapele ho sefahleho sa Molimo. Jesu, ka ho loka hoo ho phehethileng, ho betliloeng bophelong ba Hae ke mahlomola (Baheb. 2:10), o eme kapele ho Molimo, a re kopela tšoarelo ea libe le matla holim' a sebe, hobane ka ntle ho sena re ne re tlo hloka tšepo, hona joale le kahlolong.

Rapela o thuisa taba ea motho, Motho e mong ea kileng a ba le booiphihlelo ba teko ea ho etsa sebe, a eme kapele ho Molimo leholimong. See se bolela eng ho uena u le motho? Ke tšepo e fe le khotatso tse tlišoang ke taba ee?

Ho Ithuta Haholoanyane:

“Lenyeloi le phahameng ka ho fetisisa leholimong le ne le se na matla a ho lefa theko ea moea o le mong o lahlehileng. Likerobime le lirafime li na feela le khanya eo li e fuoeng ke ‘Mopi e le libopuo a tsa Hae, ‘me poelano ea motho le Molimo e ne e ka fihleloa feela ke ‘muelli ea lekanang le Molimo, ea neuoeng makhabane a ka mo phahamisang, a mo hlahisa e le ea loketseng ho buisana le Molimo oa bosafeleng bakeng sa motho, hape a emele lefatše le oeleng kapele ho Molimo. Ea nkang sebaka sa motho le ho mo lefella e ka khona a be le sebopeliso sa motho, khokahano le lelapa la botho leo a lokelang ho le emela, ‘me, joalo ka moemeli le Molimo, o lokela hape a be le sebopeliso sa Molimo, a be le khokahano le Rabosafeleng, e le hore a tle a bonahatse Molimo lefatšeng, ‘me e be ‘muelli mahareng a Molimo le batho.”—Ellen G. White, *Selected Messages*, buka ea 1, leq. 257. “Jesu o tsoela pele: Ha u mpoela kapel’a batho, le ‘na ke tla u bolela kapel’a Molimo le manyeloi a halalelang. Le tla ba lipaki tsa ka lefatšeng, le be mecha eo ka eona mohau oa Ka o ka phallang ho ea folisa lefatše. Ka mokhoa o joalo ke tla ba moemeli oa lona leholimong. Ntate ha a bone semelo sa hau se likoli, empa o u bona u apesitsoe ho phetheha ha Ka. Ke mocha oo ka oona lithohonolofatso tsa leholimo li tlang ho uena. ‘Me e mong le e mong ea bolelang lebitsoa la ka ka ho arolelana ka sehlabelo seo ke se etselitseng ba lahlehileng o tla boleloa e le karolo ea khanya le thabo ea balopolloa.”—Ellen G. White, *The Desire of Ages*, leq. 357.

Lipotso tsa Puisano:

1. Bala Baroma 5:2, Bafese 2:18, le Baefese 3:12. Li re’ng e re thusang ho utloisisa katamelo ea rona ho Ntate ka Jesu?
2. Sheba qotsulo ea Ellen G. White e kaholimo. Hlokomela kamoo a hlahosang mosebetsi oa ‘muelli. Ha Ntate a re talima, ha a bone semelo sa rona se nang le sekoli empa o bona phetheho ea Kreste. Tsepama holim’a se boleloang ke taba eo e be u buisana ka eona le sehlopha.
3. Ha u talima seo re ithutileng sona bekeng ena, ipotse na u ne u tla araba potso ena joang, “Kreste o ka sehalalelong sa leholimo. Joale? Seo se bolela’ng bophelong ba letsatsi le letsatsi?”

Kakaretso: Tlhophiseho ea selekane sa khale sa mahlabelo e ile ea nkeloa sebaka ke e ncha; ho e-na le hore ho etsoe sehlabelo ka liphoofole ke baprista ba baetsalibe sehalalelong se lefatšeng, joale re na le Jesu, Sehlabelo sa rona se phehethileng. O re emetse kapele ho Ntate sehalalelong sa leholimo, e leng se etsang motheo oa selekane se secha le lipallo tsa sona.